

REGIONAL NEWS UNIT
ALL INDIA RADIO, AGARTALA
Date: 08-08-2024
Time: 07:55-08:05 PM Hrs
BENGALI EVENING BULLETIN

Headlines :

- (১) রাজ্যে ত্রিস্তর পঞ্চায়েত নির্বাচন আজ শান্তিপূর্ণভাবে শেষ হয়েছে ।
- (২) আগামীকাল থেকে রাজ্যেও হর ঘর তিরঙ্গা কর্মসূচি শুরু হচ্ছে ।
- (৩) প্রয়াত হলেন পশ্চিমবঙ্গের প্রাক্তন মুখ্যমন্ত্রী বুদ্ধদেব ভট্টাচার্য ।
- (৪) ৩৩তম প্যারিস অলিম্পিকে হকিতে ভারত ব্রোঞ্জ পদক দখল করেছে ।

Panchayat Election :

রাজ্যে ত্রিস্তর পঞ্চায়েত নির্বাচন আজ শান্তিপূর্ণভাবে শেষ হয়েছে। সর্বশেষপ্রাপ্ত তথ্য অনুযায়ী পঞ্চায়েত নির্বাচনে ভোটের হার ৭৯.০৬ শতাংশ। ত্রিস্তর পঞ্চায়েতে মোট ৬ হাজার ৯০৯টি আসনের মধ্যে আজ ২ হাজার ১০৩টি আসনে ভোট গ্রহণ করা হয়। প্রার্থী ছিলেন মোট ৪ হাজার ৭৬১ জন প্রার্থী। বাকি ৪৮০৬টি আসনে বিজেপি প্রার্থীরা বিনা প্রতিদ্বন্দ্বিতায় জয়ী

হয়েছেন। রাজ্যের ৩৫টি ব্লকে মোট ২ হাজার ২১৯টি ভোট কেন্দ্রে আজ ভোট গ্রহণ করা হয়।

রাজ্য নির্বাচন কমিশনার শরদিন্দু চৌধুরী আকাশবাণীকে জানিয়েছেন, আজ পঞ্চায়েত নির্বাচনের ভোট গ্রহণ কেন্দ্র করে বিভিন্ন রাজনৈতিক দলের পক্ষ থেকে বিক্ষিপ্তভাবে কিছু অভিযোগ নির্বাচন কমিশনে এসেছে। সঙ্গে সঙ্গে সংশ্লিষ্ট জেলার জেলা শাসক এবং পুলিশ সুপারকে ঐ সমস্ত অভিযোগ সম্পর্কে অবহিত করা হয়েছে এবং প্রয়োজনীয় ব্যবস্থা গ্রহণের নির্দেশ দেওয়া হয়েছে বলে শ্রী চৌধুরী জানান।

Election-Kumarghat :

রাজ্য নির্বাচন কমিশনার শরদিন্দু চৌধুরী জানিয়েছেন, কুমারঘাট ব্লকের মশাউলিতে লক্ষ্মীপুর এস বি স্কুলের একটি ভোট কেন্দ্রে ব্যালট পেপার বিভ্রাটের কারণে গ্রাম পঞ্চায়েত নির্বাচনের ভোট গ্রহণ করা যায়নি। তবে এই ভোট কেন্দ্রে পঞ্চায়েত সমিতি ও জিলা পরিষদ নির্বাচনে ভোট গ্রহণ করা হয়েছে। শ্রী চৌধুরী জানান, ঊনকোটি জেলা নির্বাচনী আধিকারিকের কাছ থেকে এবিষয়ে রিপোর্ট পাবার পরই ঐ ভোটকেন্দ্রে গ্রাম পঞ্চায়েতের নির্বাচনের ভোট গ্রহণ পুনরায় গ্রহণের এবিষয়ে সিদ্ধান্ত নেওয়া হবে।

Panchayet Election-Unakoti :

আমাদের জেলা প্রতিনিধি অনুপম ভট্টাচার্য জানিয়েছেন, ঊনকোটি জেলার কুমারঘাট, গৌরনগর ও চন্ডীপুর ব্লকের মোট

২৩৪টি ভোট কেন্দ্রে ভোট গ্রহণ করা হয়। ভোটগ্রহণের নির্ধারিত সকাল সাতটার আগেই অনেক ভোটার লাইনে সারিবদ্ধভাবে দাঁড়িয়ে পড়েন। সকালে ভোটদানের হার কম থাকলেও বেলা বাড়ার সাথে সাথে ভোটদানের হার ও বাড়তে থাকে। বিশিষ্টজনদের মধ্যে মৎস্যমন্ত্রী সুধাংশু দাস চন্ডীপুর ব্লকের পৈঁচারডহর এস,বি স্কুল বুথে ও জেলা কংগ্রেস সভাপতি মোঃ বদরুজ্জামান গৌরনগর ব্লকের অধীন টিলাবাজার স্কুল বুথে তাঁদের ভোটাধিকার প্রয়োগ করেন। এদিকে ঊনকোটি জেলার জেলা নির্বাচন আধিকারিক তথা জেলা শাসক দিলীপ কুমার চাকমা, জানান, আজকের ভোটপর্ব ছিল শান্তিপূর্ণ।

Panchayat Election-Sepahijala :

আমাদের জেলা প্রতিনিধি অভিজিৎ বর্ধন জানিয়েছেন, সিপাহীজলা জেলার ৬টি ব্লকে ৩২৫টি ভোট কেন্দ্রে আজ ভোট গ্রহণ করা হয়। কয়েকটি বিক্ষিপ্ত ঘটনা ছাড়া শান্তিপূর্ণ ভাবেই ভোটগ্রহণের কাজ শেষ হয়েছে। ভোটাররা উৎসাহ-উদ্দীপনার মধ্যে দিয়ে তাদের গণতান্ত্রিক অধিকার প্রয়োগ করেছেন।

Panchayet Election-GOMATI :

আমাদের গোমতি জেলা প্রতিনিধি শ্যামসুন্দর দত্ত জানিয়েছেন, কয়েকটি বিক্ষিপ্ত ঘটনা ছাড়া জেলায় ত্রিস্তর পঞ্চায়েতের ভোট গ্রহণ শান্তিপূর্ণভাবে শেষ হয়েছে। জেলা শাসক তথা জেলা নির্বাচনী আধিকারিক তড়িৎ কান্তি চাকমা জানিয়েছেন, জেলার চারটি ব্লক এলাকায় মোট ২৭৯টি ভোট কেন্দ্রে ভোট গ্রহণ করা

হয়েছে। কংগ্রেস এবং সিপিআইএম দলের পক্ষ থেকে অভিযোগ করা হয়েছে গোমতি জেলায় ভোট গ্রহণে ব্যাপক অনিয়ম হয়েছে। বিরোধী দলের পোলিং এজেন্টদের বহু ভোট কেন্দ্রে যেতে দেওয়া হয়নি। অনেক ভোটারদের ভোটকেন্দ্রে যেতে দেওয়া হয়নি।

Panchayet Election-Khowai :

আমাদের জেলা প্রতিনিধি আশীষ চক্রবর্তী জানিয়েছেন, খোয়াই জেলাতে শান্তিপূর্ণভাবে ভোট শেষ হয়েছে। খোয়াই জেলায় জিলা পরিষদের মোট আসন ১৩টি। এর মধ্যে তেলিয়ামুড়ায় ২টি এবং খোয়াইতে ৬টি আসনে ভোট হয়। বাকি আসনগুলি বিজেপি বিনা প্রতিদ্বন্দ্বিতায় জয়ী হয়। পঞ্চায়েত সমিতিতে তেলিয়ামুড়ায় ৬টি আসন এবং খোয়াইতে ১১টি আসনে এবং খোয়াই জেলার তিনটি ব্লকের ৫৪টি গ্রাম পঞ্চায়েতের মধ্যে আজ ভোট গ্রহণ অনুষ্ঠিত হয়।

HAR GHAR TIRANGA-National :

কেন্দ্রীয় সংস্কৃতি ও পর্যটন মন্ত্রী গজেন্দ্র সিং শেখাওয়াত আজ ঘোষণা করেছেন, তৃতীয় পর্বের "হর ঘর তিরঙ্গা" প্রচার কর্মসূচী আগামীকাল থেকে থেকে আগামী ১৫ই আগস্ট পর্যন্ত পালিত হবে। স্বাধীনতা দিবস উদযাপন উপলক্ষে আজ নতুনদিল্লিতে এক সাংবাদিক সম্মেলনে মন্ত্রী বলেন যে এই উদ্যোগের লক্ষ্য প্রতিটি ভারতীয়কে জাতীয় পতাকা, তিরঙ্গা উত্তোলন করতে উৎসাহিত করে নাগরিকদের মধ্যে দেশপ্রেম এবং জাতীয় গর্বের চেতনা

জাগানো। মন্ত্রী নাগরিকদের তাদের বাড়িতে তিরঙ্গা উত্তোলন করার এবং পতাকার সাথে একটি সেলফি ক্লিক করে harghartiranga.com-এ আপলোড করার আহ্বান জানান। মন্ত্রী বলেন ২০২২ সালে আজাদি কা অমৃত মহোৎসবের অঙ্গ হিসেবে "হর ঘর তিরঙ্গা" প্রচারাভিযানটি সারা দেশে একটি জন আন্দোলনে পরিণত হয়।

HAR GHAR TRIRANGA :

এদিন রাজ্যেও তথ্য সংস্কৃতি দপ্তরের সচিব ডঃ প্রদীপ চক্রবর্তী আজ সচিবালয়ে এক সাংবাদিক সম্মেলনে জানান, আগামীকাল থেকে আগামী ১৫ই আগস্ট পর্যন্ত রাজ্যেও হয় হর ঘর তিরঙ্গা কর্মসূচি চলবে। এই কর্মসূচিতে রয়েছে জাতীয় পতাকা নিয়ে পদযাত্রা, সাইকেল র্যালি, মোটর বাইক র্যালি ও তিরঙ্গা রান। তাছাড়া রয়েছে সঙ্গীতানুষ্ঠান তিরঙ্গা কনসার্ট, তিরঙ্গা চিত্রাঙ্গন। তিরঙ্গা ক্যানভাসে জনসাধারণের সাক্ষর সম্বলিত হর ঘর তিরঙ্গা অথবা জয় হিন্দ লেখা পোস্টার বিভিন্ন জায়গায় লাগানো হবে। তা হরঘর তিরঙ্গা ডট কম ওয়েব সাইটে পোস্ট করা হবে। যেসব স্থানে স্বাধীনতা সংগ্রামীদের স্মরনে, শিলা ফলক লাগানো হয়েছিল, সেখানে এবছর দেশের জন্য শপথ নেওয়া হবে। তাছাড়া প্রতিটি জেলায় দেশপ্রেমিক ও শহীদদের সম্মান প্রদর্শন করা হবে। ৯ই থেকে আগামী ১৩ই আগস্ট জেলা, প্রশাসনের উদ্যোগে সব জেলায় তিরঙ্গা মেলার আয়োজন করা হবে। এছাড়া ১৩ থেকে ১৫ই আগস্ট বিভিন্ন সেলফি পয়েন্টে ছবি তুলে তা, হর ঘর তিরঙ্গা ওয়েবসাইটে আপলোড করা যাবে।

Buddhadeb Bhattacharjee :

পশ্চিমবঙ্গের প্রাক্তন মুখ্যমন্ত্রী বুদ্ধদেব ভট্টাচার্য দীর্ঘ রোগভোগের পর আজ সকাল আটটা কুড়ি মিনিট নাগাদ কোলকাতার পাম এভিনিউস্থিত নিজ বাসভবনে শেষ নিঃশ্বাস ত্যাগ করেন। মৃত্যুকালে তাঁর বয়স হয়েছিল ৮০ বছর।

বুদ্ধদেব ভট্টাচার্যের মৃত্যুতে গভীর শোকপ্রকাশ করেছেন রাষ্ট্রপতি দ্রৌপদী মুর্মু। এক শোক বার্তায় তিনি বলেন, প্রবীণ এই নেতা ছিলেন নীতিনিষ্ঠ রাজনীতির প্রতীক। পশ্চিমবঙ্গের মানুষের কল্যাণে তাঁর অবদানের জন্য তিনি সর্বদা স্মরণীয় হয়ে থাকবেন।

উপরাষ্ট্রপতি, জগদীপ ধনখর পশ্চিমবঙ্গের প্রাক্তন মুখ্যমন্ত্রী বুদ্ধদেব ভট্টাচার্যের মৃত্যুতে শোক প্রকাশ করেছেন। "এক্স" এর একটি বার্তায় তিনি বলেছেন পশ্চিমবঙ্গের রাজ্যপাল হিসেবে অনেক সময় তিনি প্রয়াত ভট্টাচার্যের বিজ্ঞ পরামর্শের সুফল পেয়েছেন। শ্রী ধনখর বিদেহী আত্মার সদগতি কামনা করে শোকসন্তপ্ত পরিবারের সকল সদস্য ও স্বজনদের প্রতি আন্তরিক সমবেদনা জানিয়েছেন।

প্রধানমন্ত্রী নরেন্দ্র মোদী বুদ্ধদেব ভট্টাচার্যের মৃত্যুতে শোক প্রকাশ করেছেন। এক্স এ এক বার্তায় তিনি বলেন বুদ্ধদেব ভট্টাচার্য এমন একজন রাজনৈতিক নেতা ছিলেন যিনি প্রতিশ্রুতি মতো রাজ্যের সেবা করে গেছেন। প্রয়াতের পরিবার এবং সমর্থকদের প্রতি প্রধানমন্ত্রী আন্তরিক সমবেদনা জ্ঞাপন করেন।

বুদ্ধদেব ভট্টাচার্যের প্রয়াণে মুখ্যমন্ত্রী অধ্যাপক ডাঃ মানিক সাহা গভীর শোক জ্ঞাপন করেছেন। এক শোকবার্তায় মুখ্যমন্ত্রী বলেন, তাঁর প্রয়াণে পশ্চিমবঙ্গ একজন অভিজ্ঞ, সজ্জন, বিশিষ্ট লেখক,

প্রবীণ রাজনীতিবিদ ও প্রশাসককে হারাল।' মুখ্যমন্ত্রী ডা: সাহা প্রয়াত বুদ্ধদেব ভট্টাচার্যের বিদেহী আত্মার চিরশান্তি কামনা করেন এবং তার শোকসন্তপ্ত পরিবার পরিজনদের প্রতি গভীর সমবেদনা জানান। পরিবহণ মন্ত্রী সুশান্ত চৌধুরীও বুদ্ধদেব ভট্টাচার্যের প্রয়াণে গভীর শোক প্রকাশ করেছেন।

BJP-Press Meet :

রাজ্যের আজ পঞ্চায়েত নির্বাচন শান্তিপূর্ণভাবে শেষ হয়েছে বলে বিজেপি'র মুখ্য প্রবক্তা সুব্রত চক্রবর্তী আজ আগরতলায় সাংবাদিক সম্মেলনে দাবি করেছেন। তিনি বলেন ভোটাররা আজ উৎসবের মেজাজে ভোট দিয়েছেন। তিনি নির্বাচন সুষ্ঠুভাবে সম্পন্ন হওয়ায় রাজ্যের নির্বাচন কমিশন, সাধারণ প্রশাসন, পুলিশ প্রশাসন থেকে শুরু করে নির্বাচনের সঙ্গে যুক্ত সবাইকে ধন্যবাদ জানিয়েছেন।

CPIM Press Meet :

সিপিআইএম রাজ্য সম্পাদক জিতেন্দ্র চৌধুরী আজ সন্ধ্যায় আগরতলায় এক সাংবাদিক সম্মেলনে অভিযোগ করেছেন শাসক দল বিজেপি আজ ত্রিস্তর পঞ্চায়েত নির্বাচনকে প্রহসনে পরিনত করেছে। বিরোধী দলের এজেন্টদের ভোট কেন্দ্রে ঢুকতে দেওয়া হয়নি। অমরপুর, সিপাহীজলা, দক্ষিণ জেলা এবং পশ্চিম ত্রিপুরা জেলার বিভিন্ন এলাকায় শাসক দল সন্ত্রাস করেছে। এক্ষেত্রে পুলিশ কোনো ব্যবস্থা নেয় নি বলে শ্রী চৌধুরী অভিযোগ করেন। যে সমস্ত ভোটকেন্দ্রে সন্ত্রাসের কারণে ভোটাররা ভোট দিতে

আসতে পারেনি সেই সমস্ত ভোটকেন্দ্রে পুনরায় ভোট গ্রহনের জন্য শ্রী চৌধুরী দাবি জানিয়েছেন। সাংবাদিক সম্মেলনে উপস্থিত ছিলেন রাজ্য বামফ্রন্টের আহ্বায়ক নারায়ণ কর, নারী নেত্রী রমা দাস।

World Adibashi Diwas :

আগামীকাল বিশ্ব আদিবাসী দিবস। এই উপলক্ষ্যে স্বশাসিত জেলা পরিষদের উদ্যোগে আগামীকাল সকালে খুমলুং ডুকমালি হাটি থেকে নুউই অডিটোরিয়াম হল পর্যন্ত চিরাচরিত পোষাকে সজ্জিত হয়ে বিভিন্ন সম্প্রদায়ের আদিবাসিরা বর্ণাঢ্য শোভাযাত্রায় অংশ গ্রহণ করবেন। তাছাড়া খুমলুং-এ এডিসি আয়োজিত বিশ্ব আদিবাসি দিবস অনুষ্ঠানের উদ্বোধন করবেন সমবায় দপ্তরের নির্বাহী সদস্য অনন্ত দেববর্মা।

বিশ্ব আদিবাসি দিবস উপলক্ষ্যে এডিসি চেয়ারম্যান জগদীশ দেববর্মা, মুখ্যনির্বাহী সদস্য পূর্ণচন্দ্র জমাতিয়া ও তথ্য সংস্কৃতি নির্বাহী সদস্য সুহেল দেববর্মা জনগনের শুভেচ্ছা জানিয়েছেন।

NEET-PG 2024 :

সরকার NEET-PG ২০২৪-এর প্রশ্নপত্র ফাঁসের মিডিয়া রিপোর্ট প্রত্যাখ্যান করেছে। কেন্দ্রীয় স্বাস্থ্য মন্ত্রক এই ধরনের রিপোর্টগুলিকে মিথ্যা এবং বিভ্রান্তিকর বলে অভিহিত করেছে। মন্ত্রক সমস্ত প্রার্থীদের আশ্বাস দিয়ে বলেছে যে ন্যাশনাল বোর্ড অফ এক্সামিনেশনস ইন মেডিকেল সায়েন্সেস, NBEMS এখনও NEET-PG ২০২৪-এর প্রশ্নপত্র তৈরি করেনি এবং সামাজিক

মাধ্যমে প্রশ্নপত্র ফাঁসের খবর জাল বলে মন্তব্য দাবি করেছে। মন্তব্য বলেছে যে NBEMS ইতিমধ্যেই এই ধরনের প্রতারণা এবং তাদের সহযোগীদের বিরুদ্ধে পুলিশে অভিযোগ নথিভুক্ত করেছে যাতে বলা হয়েছে NEET-PG প্রার্থীদের অর্থের জন্য প্রশ্ন প্রদানের নামে বোকা বানানোর চেষ্টা করা হয়। এছাড়াও প্রার্থীদের এই ধরনের অসাধু প্রচেষ্টায় প্রলুব্ধ বা বিভ্রান্ত না হওয়ার জন্য সতর্ক করা হয়েছে।

এই ধরনের কোনো ব্যক্তি, এজেন্ট বা দালাল যদি কোনও প্রতারণামূলক ইমেল/এসএমএস বা টেলিফোন কল বা জাল নথির মাধ্যমে বা ব্যক্তিগতভাবে বা সোশ্যাল মিডিয়ার মাধ্যমে যোগাযোগ করে, তাহলে তা নিয়ে এনবিইএমএস'র কাছে বা স্থানীয় পুলিশে অভিযোগ জানানোর জন্য পরীক্ষার্থীদের পরামর্শ দেওয়া হয়েছে।

Jal Jeevan Mission :

কেন্দ্রীয় জলশক্তি মন্ত্রী সি আর পাটিল বলেছেন জল জীবন মিশনের অধীনে, সরকার সারা ভারতে ৭৭ শতাংশেরও বেশি গ্রামীণ পরিবারকে কলের জলের সংযোগ প্রদান করেছে। লোকসভায় আজ এক পরিপূরক প্রশ্নের উত্তরে তিনি একথা বলেন। তিনি বলেন নরেন্দ্র মোদী সরকার ২০১৯ সালে এই প্রকল্পটি শুরু করেছে এবং এর আওতায় এখনও পর্যন্ত ১৫ কোটি পরিবারকে কলের জলের সংযোগ দেওয়া হয়েছে। শ্রী পাটিল আরও বলেন, একটি সমীক্ষা অনুসারে, পরিবারগুলিতে পরিষ্কার এবং নিরাপদ পানীয় জল সরবরাহের ফলে রোগ নির্মূল করে আট লক্ষ কোটি টাকারও বেশি সাশ্রয় হয়েছে।

Olympic :

৩৩তম প্যারিস অলিম্পিকে হকিতে ভারত ব্রোঞ্জ পদক দখল করেছে। আজ ২-১ গোলে স্পেনকে হারিয়ে ভারত এই পদক লাভ করে। উল্লেখ্য, ভারতীয় হকি দল ২০২০ সালের টোকিও অলিম্পিকে ব্রোঞ্জ পদক বিজয়ী ছিল।

এদিকে পুরুষদের জ্যাভলিন থ্রো ফাইনালে নীরজ চোপড়া আজ রাত ১১টা ৫৫ মিনিটে তার স্বর্ণপদক রক্ষা করার জন্য লড়বেন। নীরজ চোপড়াও টোকিও ২০২০'র অলিম্পিকের স্বর্ণপদক বিজয়ী ছিলেন।

S M Cup Football :

দিল্লিতে অনুষ্ঠিত সুব্রত মুখার্জি কাপ বালিকাদের ফুটবলে আজ ত্রিপুরা স্পোর্টস স্কুল ৩-০ গোলে মিজোরামকে পরাজিত করেছে। উইলিংটন তেজশ মাঠে অনুষ্ঠিত এই খেলায় ত্রিপুরার হয়ে মেরিন জমাতিয়া দুটি এবং শ্রীয়া দেব দুটি গোল করেন। রাজ্য দলের ম্যানেজার শুভেনজিৎ সিনহা জানান, লাগাতর তিন ম্যাচে ত্রিপুরা স্পোর্টস স্কুল সবকটিতে জয় পেয়ে এ গ্রুপে শীর্ষে রয়েছে।

Weather :

আগামী ২৪ ঘন্টায় রাজ্যের দক্ষিণ এবং সিপাহীজলা জেলার দুয়েক জায়গায় ভারী বর্ষণের সতর্কতা জারি করেছে আবহাওয়া দপ্তর। আগামীকাল আকাশ সাধারণত মেঘাচ্ছন্ন থাকবে দু এক

জায়গায় বজ্রবিদ্যুৎ সহ হালকা থেকে মাঝারি পর্যায়ে বৃষ্টিপাতের
সম্ভাবনা রয়েছে। আগামীকাল তাপমাত্রা সর্বোচ্চ ৩২ ডিগ্রি
সেলসিয়াস এবং সর্বনিম্ন ২৬ ডিগ্রি সেলসিয়াসের কাছাকাছি
থাকবে। আজ আজ দিনের সর্বোচ্চ তাপমাত্রা ছিল ৩০ দশমিক
৬ ডিগ্রি সেলসিয়াস এবং সর্বনিম্ন ২৫ দশমিক সাত ডিগ্রী
সেলসিয়াস।
